



~~C 8288~~

Vld 5360

Biblioteka Jagiellońska



stdr0007433

- 1,
- 2, *Epitaphia Cphi. Merzini* a Kurozwoski.
- 3, *Drewo*, Chroph. Radziwil.
- 4, *Burfius*, *Oratio funebris*.
- 5, *Tacobellus*, *Feralis pompa in funere A. Corvini*.
- 6, *Kiemek*, Andr. Lipe Lipski.
- 7, *Tacobellus*, idem g. no. 5.
- 8, Ch. de Chaluz Chalucky.
- 9, *Comenius*, *Spiegel Guttern Obigkeit*.

6
ILLVSTRISSIMO T REVE

rendissimo Domino,

D. ANDREÆ à LIPE
LIPSKI,

Dei G. Episcopo Cracouiensi,
Duci Seueriensi, &c.

Felicem in Episcopatum Cracouiensem
ingressum,

GRATVLATVR

CASPARVS SIEMEK.

M. Iannis Cyn. Rastamouf Coll. Hinc. onti eloy l.
A. D. 1635



CRACOVIAE,

In Officina Typogr. Matthiae Andreonensis,

Anno M. DC. XXXI.

6



*Heu fuge zyzanium veniunt iam tempora mes-
s-
Disidet hoc Ras trum, fiet aris ta nitem.*

645463



Redo ego frequentes viros vni-
diq; ornatissimos, eandem me-
cum rem tractaturos, tibiq; ve-
terem quidem dignitatem, no-
uam autem amplitudinem, gra-
tulaturos Illustris: & Reueren-
dis: Domine. Credo & certò scio, nam & au-
toritas, & existimatio tua tanta est, quanta o-
mnium expectationi, satisfaciet, & superabit eti-
am omnium spem atq; expectationem, cui se
commendare nemo non studebit. Non tantum
enim Sympathia res rebus coniungit, quantū vi-
ri integritate & virtutibus ornatissimi, allicimur
claritate honestateq; ad se amandum; Summum
quisq; talis, incitat in nobis sui desiderium: atq;
in admirationem rapimur, cum virum tempore
hoc, quo, virtus & sapientia, profligatæ & prosc-
riptæ exulant conspicimus: virum inquam talem,
quo cum summi illi viri antiqui, eruditione &
probitate, contenderent. Aut ingrati aut inuidi
fuiſſet, gloriæ, & genti, & sæculo nostro, non ire
obuiam eamq; dignis non excipere gratulationi-
bus: non credo quemquam adeò in officiosum

A

posse

posse reperiri, qui laborem hunc honestissimum
postponere velit, præsertim hac in provincia
virosum literatorum, quæ illis est refertissima.
Nam & nobilitas in ea, non inerudita, cuius do-
mos libraria supellectile exornatas, egregiè repe-
ries, & Academia mater omnium literarum ibi-
dem habetur, quæ olim viris, omnibus facultati-
bus cum primis florentissimis erat gloriosissima,
nec modo ignobilis iacet, retinet adhuc pristinae
gloriæ faciem, retinet existimationem, retinet au-
toritatem, atq; expectationi omnium satisfacere
potest, & est parata: Sunt ibi viri plurimi in diuer-
sis facultatibus exercitatissimi hi omnes Te expe-
ctant, Te desiderant, Te inuocant, Te Protecto-
rem amantiùs, quam Cancellarium salutabunt:
Hoc enim demum tempore magis Protectore o-
pus habebunt: hos cum gratulationibus tibi ob-
uios habebis, tam è nobilitate, quam è Scholasti-
cis viros frequentissimos. Et quidem in tanta vi-
rorum doctorum copia superledendum mihi ar-
bitrabar, cuius si generis antiquitatem spectes,
non postremum iudicares, si eruditionem, quin
me homuncionem appelles, parum abest, neque
enim

enim sum cum viris literatissimis comparandus,
quorum officij est summorum virorum exornare
laudes, conseruare gloriam, incitare in reliquis
virtutem: magnam sese rem quisq; effecisse exi-
stimet, qui alienam satis laudauit virtutem. Enim-
uero si simulachra, imaginesq; affabrè factæ pu-
blicis sumptibus viris clarissimis erigi solebant &
solent, quarum intuitu posteritas comoueretur:
multò conuenientius scriptis publicis iidem sunt
ornandi, nam hæc ad plurimorum oculos sunt
peruentura. Lineamenta corporis in simulacris,
tatum exprimi possunt, at scriptis præter ista, ani-
mi etiam dotes, quantumuis maximæ ad vnguē
depinguntur: plurima simulachra, improbissimo-
rum hominum fuisse comperimus, tyrannorum
etiam quorundam, ea enim à fabris seu huius ge-
neris artificibus efformari solent, scripta tantum
à viris doctis, quorum dignoscere probitatem ab
improbitate, dignum ab indigno discernere non
adulari maximum est officium. Hoc attribuo cæ-
teris, mihi idem non arrogo, qui nec ingenio par,
nec exercitatione dicendi illis sum comparandus.
Qua de causa duas leges, easque necessarias mihi

imposueram, nimirum; neq; ad Rempublicam
(vt dicitur) illotis manibus accedere, id enī ad
sanctitatem Maieſtatis Reipub. pertinere videtur,
ne eam cuius nisi bene præparato, atq; instructif-
ſimo animo attingere liceat, vel ne illud quod ſa-
croſanctum eſt indignis funeſtetur manibus: neq;
quidpiam in publicum edere, niſi perfectum in-
genio, elaboratum industria iudicari poſſit: hoc
tamen extorſit à me opportunitas occaſionis, ex-
torſit feruor ſtudij erga dignitatem tuam incredi-
bilem, vt legum mihi impoſitarum alteram ſer-
uarē, infringere alteram. Et vero difficilis eſt iſta
materia & quodā modo mihi, itaq; timeo impar
ne volendo tātī viri augere honorē, ipſum immi-
nuā, cū laudari à viro laudato ſit in precio: tamen
audaciā eſſe dimidiū victoriæ, & multo plures in
fuga, quam in prælio cecidiſſe pro comperto ha-
beo. Ita ſane qui non cōtendit nō vincit. Et quā-
tumuis amplitudo tuæ dignitati, ſapiētīæ magni-
tudo, & iudicij ſui ſagacitas me proſternant: be-
nevolentia tamen & humanitas tua me erigunt,
atq; ad progrediendum cohortantur; etſi repu-
tē nullum tuo ſatiſfacturum iudicio, quod omniū
longè

longè ſuperauit eloquentiam atq; ingenia: immò
ceſſare nos omnes ab hoc opere oporteret, ſi tu-
am eruditionem, ſi prudentiam ponderauerimus,
quia plus habes virtutum quam nos eloqui poſſu-
mus. Quod cum vniuerſæ Europæ planum ſit,
idq; confiteri quā plurimos, auribus meis per-
cepiffem cō magis erigor, & ſilere nullo modo
poſſum, ſupplebit enim humanitas tua, quos bal-
buties mea, afferet defectus, ſupplebis inquam
Illuſtriſſ: & Reuerendiſſ: Præſul. nam vbi multum
prudentiæ, ibi plurimum humanitatis, artes enim
non ipſæ ſunt humanæ, ſed quia humanos effici-
unt, humaniores ideo appellantur. Et quò quiuis
artibus inſtructior, clarior, eruditiorue extiterit,
ille idem moribus ſuauior, in conuerſatione gra-
tioſior, ad benevolentiam facilior, promptiorq;
eſſe ſolet: arrogantia male exculti animi eſt viti-
um, ſi quid laudis, ſi quid gloriæ, meremur, id
ab hominibus nobis attribui debet. Nemo igi-
tur eruditus, qui abſque humanitate fuerit:
Neque enim magnum ſui deſiderium, ſummi
viri mortalibus inuſſent, ſi moroſitatis quid-
piam eruditio admitteret. Solon quidem qui

vnus septem sapientum, & ex iisdem septem solus scriptor legum fuerat, humanitate sua effecerat, vt vltro Athenienses leges suas recepissent, seque cum suis fortunis, sibi concedidissent. Et quod Licurgus vi, amicorumque potentia perfecisse creditur, id Solon humanitate, quam à bonis artibus hauserat effecisse dicitur. Et Socratis suauitatem tyranni, & Pythagoræ admirabilem comitatē adamauerunt Romani: mirificos enim non modo ipsa sapientia, sed sapientes etiam, in nobis incitant amores, propter gratissimas omnibus virtutes. Vnum commemorabo, quem tot tantique venerantur viri disertissimi, oratores & Philosophi, cum inquam, qui cum omnes in se haberet virtutes, præter nomen nihil barbari habebat. Quod si ita est? est autem certè, quod viri eruditione clarissimi, haud quaquam contemnant, se etiam inferiores, quid obstat, quin me poripiam, ad hoc te rudi calamo excipiendum? Non facile aliena contemnit, qui suorum bonus est autor. Neque enim hunc impendo laborem vt gratiam referam tuam, alieno enim sum instituto quàm clementiâ tua mihi prodesse possit: Neque expecto

expecto vtilitatem, nihil enim mihi deest ad vitam conuenienter & honestè ducendam, neque etiam volo, vt quod à me rectè geritur, illud à mercede euacuetur: Sed vt Dei prouidentia, agam grâcias, & te Præsulem optatissimum, desideratissimumque, quem nobis dari perquam optabamus, honorificentissime excipiam, id cordi, id animo, id in votis, id in desiderio fuit, est, eritque semper. Itaque à Te Illustriss: & Reuerendiss: Domine præparato, artibus exculto, & omni virtutum genere exornato, nihil pertimescendum mihi videtur. quamuis enim mihi desit plurimum, tuæ tamen humanitati deest nihil, ego rudis sum, Tu excultissimus, supplebis itaque tua benignitate meam crassionem Mineruam, humanitate, meam austeritatem & raucedinem, Tua grauitate meam pueritiam, in te igitur & in Tua prudentia, omnis spes mea, expectatio mea, conatus meus conquiescet. Est tamen quod me adhuc angit & conturbat, temporibus his peruersis, quibus virtus præ inuidia in abditissima penetralia sese occultaui, oculisque maleuolorum subtraxit, quod sine assentationis suspitione, nemo vnquam præsentem lau-

tem laudauit: nam vt absentes, absq; opinione
detractionis vituperare non possumus, ita præ-
sentes propter suspicionem assentationis laudare
non solemus. Nemo vnquam probè laudauit
præsentem, absentem nemo verè vituperauit.
Erat hoc verum olim, erat; cum virtus, cum amor
patriæ, erant cordi mortalibus: nunc degenera-
runt vniuersa. Quotus est qui reprehensionem
non meretur? Bonum aliquem virum hoc tem-
pore nominare vix credibile est: Et verò quia ne-
minem, ideò & pessimum, vix vituperare licet,
satis enim malos vituperauit vita improbißima,
nihil proinde illis calamitatis addendum: virum
studiosum laudare, lex naturæ quodammodo esse
videtur, quanquam leges sequuntur necessitatem
temporum, præter eas quæ iura naturalia vocan-
tur, hæc nunquam prohibita, semper licita sunt.
Et quod alij nequissime legunt, parendum tem-
pori, parcendum, legi debere, existimo, mali enim
parent tempori, parcunt sapientes, quod vitium
forte, ex similitudine vocabulorum à scriptori-
bus imperitis irrepsit. Parco itaq; ijs qui primi, id
fecerunt non abs re tamen, quia boni, laude in-
rabiem

rabiem non aguntur, ad virtutem magis impel-
luntur gloria. Fecit hoc Cic: pro Q. Ligario. fe-
cit pro rege Deiotaro, præsentem laudauit Cæsa-
rem, vel vt bonam ipsius voluntatem, de dicta-
tura deponenda acceleraret, vel vt clementiam
in victoria domestica necessariam augeret. Fecit
& M. Cato homo ab omni assentatione remo-
tissimus, qui Cn: & Sex: Magni Pompeij filios
laudauit, vt eos ad experiendam fortunam in ma-
gna publica calamitate commoueret inflamma-
retq; fecerunt & alij complures, cum ceteri tum
nostrates. Vidi ego in quadam priuata bibliote-
ca, prout ferebant illa tempora, non ineruditam
orationem, qua Sbigneus Olesnicius, recenter
Cardinalis factus, excipiebatur; vidi, summamq;
voluptatem cepi, vt par erat, vita & moribus, qua-
si per lineamenta, viri integerrimi, ne dicam san-
ctissimi perspectis & delineatis, quæ res illi viuo
non obfuit, nobis posteritati plurimum prodest.
Karnkouij Episcopi simile encomium circumfer-
tur, viri reipublicæ & libertatis amantissimi quod
in hoc ordine rarum est. Te igitur Illustris: &
Reuerendis: Præsul viuum non laudabimus: cum
B cras,

cras, incerto: post mortem certo id non si-
nister facturi: Et cum tua virtute, tua prudentia, tua
industria, tuo iudicio, animi dotibus, perspicacia,
facilitate opus habeamus: tu, à nobis nullam re-
feres gratitudinem? Quæ peruersitas? quæ im-
pudentia? quæ impietas fuisset? quid aliud desi-
gnat, illa consuetudo in coronationibus Pontifi-
cum, quod eo die officium de Pontifice peragi
soleat, si non laudes noui Pontificis: Cæterorum
optimi, neq; enim vt sanctus colitur, sed lauda-
tur vt bonus, Quem itaque permouit tua glo-
ria, erudiuit labor tuus, quin tibi referam gratias
me cohibere non potui, neq; eas pares tuæ virtu-
ti, sed mei ingenij viribus accomodatas. Ad te igi-
tur rem meam dirigam, tibi gratulabor, tu exci-
pes omnia gratiosè, amanter. Mihi potius non
tibi Illustrissime & Reuerendissime Domine gra-
tulandum esset, mihi dico, qui summa perfruar
felicitate; te Pastore, te Præsule, te Episcopo meo
ac Diœcesis Vniuersæ; mihi dico, quia propter
curam mei, insomnes noctes, laboriosos dies,
traducere cogaris: felix igitur ego sum, te Pa-
store meo existente magna obigit ista mihi feli-
citas,

citas, quia Pastor sis mihi datus, qui tua virtute
cum opus habuissem, illamq; desiderauissem, ta-
men illam implorare non audebam: nunc, vltro
mihi eam offerre teneris: immo verò non opitu-
lando mihi, magna fuisset impietas. Tuo itaque
Pastoratu factus sum prosper, felix, beatus, mihi
igitur esset gratulandum, vel vniuersæ Diœcesi,
quæ, si ponderat suam dignitatem, quid ei hac re
obtigerit, certe vehementissime, ipsam lætari ne-
cesse esset, Felices nauigantes, si Nauclerus eius
artis peritissimus, felix respublica si Princeps pru-
dentissimus, cuius in prudentia, salus consistit pu-
blica, qui, si bonus est mala maiora lenit, minora
penitus auertit, & in meliorem commutat fortu-
nam, vt qui non intelligat, pastorem bonum ha-
bere, quo loco fuerit? sit nemo: ingens igitur est
felicitas vniuersorum, te habere Episcopum, te,
nostrum esse, & custodem & iudicem: magna
est populi inde lætitia, maior totius Diœcesis, ma-
xima reipub. ingens omnium. Quod si tua ista
fuisset felicitas: cur vniuersa prorsus respublica
exultaret, te saluaret, te summa cum hilaritate
exciperet, nemo nisi suo commodo gaudere
B 2 solet,

solet, satis est si alienæ non inuidet virtuti. Atque manifestum est, tibi accessisse plurimum laboris, curæ, sollicitudinis, vigiliarum, incommoditatum: Tuæ verò Dicecesi securitatis, iustitiæ, illi igitur potius gratulandum est, quod de te spem, eamque certam, non fallacem, aliquam conceperit, magnæ tecum venturæ sibi felicitatis Olim Rex noster Stephanus. Cum indices nec incerti nec obscuri retulissent, sibi delatam esse Regni Poloniæ Coronam, Cyrillus autem Chrzastouius, cum Andrea Patruo meo, eidem, tantam gratularentur dignitatem, sapientissimè respondit. Vestre inquit Reipublicæ est gratulandum. nam si ignauus vixero, mihi perpetuam, infamiam, si ut decet Principem res administrauero, nullam mihi, immortalem reipublicæ peperero gloriam. Et verò ita est. Princeps enim ignauus, sibi infamiam, magnanimus reipublicæ parit gloriam. Et Pelopidas Thebanus ad bellum Peloponesiacum proficiscens, vxori hortanti, vt salutis suæ consulere, indignabundus dixisse fertur. Priuati inquit ô mulier de eo monendi sunt, nam Principibus cõuenit, non vt sese sed suos vt incolumes seruent, ac redu-

ac reducant, ne amissis ciuibus soli aut fortunæ ad ludibrium aut hostibus ad triumphum referuentur. Graues igitur sunt magistratus omnes, graues dignitates, sed omnium Episcopalis grauissima quæ non generatim, tantum, & vniuerse sed sigillatim de vno quoque nostrum curam indicit, iniungit, præcipit: me igitur & vniuersos cõmodum tangit, ob hanc tibi oblatam dignitatem. Nō tamen à Te quoque gratulatio debet esse aliena, quia pugnaueris, viceris, coronam acceperis, habere enim coronam, nihil affert laudis, nihil gloriæ, at habere ipsam ex victoria reportatā, res magni est momenti: qui sine virtute accepisset quamuis dignitatem, sine honore is, sine gloria, idem enim est ac si à mercatore coronam sibi comparauisset, quæ minime corona dici debet. Quia igitur eam virtute non fortuna es consecutus, vicisti, gratulandum igitur tibi est, nihil enim præter victoriam gratulationem meretur. At verò quam obrem? qua de causa tibi gratulandum venit, Quid hac victoria consecutus sis? pacem ne? quietem ne? felicitatem ne, quam piam, quæ tuæ corresponderet dignitati? nihil horum; Quo-

modo eam dignitatem felicitatem appellabo? cū magna dignitas magna sit seruitus, fastigium summum, à summo fastidio, parum differunt, quod & vocum ipsa similitudo, & rerum ipsa docuit experientia. Non Te latet (es enim omnium rerum penu refertissimum) Sbigneum Olesnium, cum hac dignitate, multum laboris, plus odiorum, plurimum periculi subiisse: nouisti, quid reipublicæ deberet, quid faceret, quid pro illa auderet, nouisti fuisse alterum Stanislaum si Boleslaus fuisset. Nouisti quantum cum hac dignitate Thomæ Cantuariensi Episcopo oneris accessisset, quem, ob similitudinem vitæ & mortis eadem cum S. Stanislao oratione, Ecclesia adornauit: non eo hoc dico, quod te ea ignorare existimem, sed ne tu ista, me ignorare existimes. Quamobrem vereor, ne tibi tum gratuler, cum libertatem & ut velis potestatem viuendi amisisses: exhorresco, ne tibi fastidium pro fastigio gratuler, nam si fastidium pro virtute, si seruitutem pro libertate retuleris, condolendum potius, non gratulandum Tibi est, nihil enim tibi reliqui fecisti, omnia Reipublicæ, Diœcesi, nobis promissisti.

fisti: quid promissisti? dedisti extradisti; quidquid opum ac facultatum habuisti, id totum, publica commotus necessitate in medium contulisti, obtulisti, publicauisti, vitam & quidquid haberes, vel habere posses te libenter ista omnia patriæ donaturum professus es, & iam fecisti. Atq; inprimis quam primum Senator factus es vitam tuam publicam ut debebas fecisti, non igitur ea tanquam priuata sed tanquam publica usus es, eam non tuis sed publicis accommodasti negotijs, quod periculum, quæ difficultas causæ, itinerum, temporis, loci, quod te à publico auerteret obsequio, quid te prohibuit vnquam quamuis prohibeant plurima, & me hercule, id totum, quidquid facere debebas tum semper cum libenter faciebas. Et rectè quidem, qui se enim publico obstrinxit magistratui, is publicam amplius suam non habet vitam: quod si publica abuti pecunia grande scelus est capite vindicandum, quid arbitrandum de vita cum qua ne digitum à publicis negotijs abesse licet, magis enim consilijs quam opibus sustentatur, publica salus. Nihil igitur huiusmodi viris ad oblectamenta, superesse

peresse debet temporis, ne illud quod publicum
sit in priuatis consumatur voluptatibus, illudque
quod sanctum esse debet, libidine profanetur, fu-
nesteturque. Africanus maior dicere solebat (nā
alter P. Æmilij F. in Scipionum familiam adopta-
tus Africanus minor ob euersam Carthaginē &
Numanciam vocabatur) nunquam se minus so-
lum esse quā cum solus fuisset, nunquam enim
re, nunquam mente aberat à republica, quem
Seneca maiorem Romæ benefactorem Romulo
fuisse asserit, hic enim ædificauit, nemine repu-
gnante, ille Haniabile & vniuersa Africa oppu-
gnantibus, eandem conseruauit. Ita equidem esse
deberet, nam qui Rempublicam negligit, is
deserit societatem, ac iura naturæ violat, is prodit
libertatem quæ res olim Sacrosancta fuit, eritque
semper quoad hic orbis terrarum stabit (tamen si
falsi rerū æstimatores, cū licentia libertatē cōfun-
dentes frustra in odium ipsam adducant) dico Sa-
crosancta libertas est. Quid? non ita leges? liber-
tas & causa pia æquiparatur, & vltra: quinimo
omni alia causa fauorabilior est: quocirca quis-
quis eam neglexerit, contempserit, spreuerit, sa-
crilegus

crilegus est, quia libertas superat causam piā.
Et habes & habebis hinc magnum nomen, quod
ijs in negotijs Reipublicæ damnosis potius quam
periculosus non defueris, vbi cum animo, vt ciuis,
cum ingenio, vt imperator, cum consilio, vt Se-
nator adfueris, vt amplius te benefactorem pu-
blicum nominare, non abs re fuisset, posteritas
vero dabit tibi eam prærogatiuam & appellatio-
nem. Magnam enim gratitudinem assertori-
bus publicæ libertatis debemus gloriamque, ma-
gna res est habere ciuem bonum: Senatorem pru-
dentem, magna & inæstimabilis, nonnunquam
enim vis & cardo reipub. in vno cōsistit, vt in The-
mistocle quondā qui vnus Atheniensem cunctan-
do restituit rem. Recens in animis nostris est Illu-
strissimi olim Christophori Ducis à Zbaraz lau-
dabiliter expedita legatio, in qua summa rerum
magnarum reipublicæ consistebat, qui cum sua,
& rarissima sapientia difficultates remouisset, &
incredibili magnanimitate, vt par erat, huius ge-
neris sanguini barbarorum temeritatem & ini-
manitatem cum superauisset, non tantum sibi
gloriæ quantum reipub. commodi attulisse, ne-
mo igno-

mo ignorat, qui ut nobis profuit viuis, ita nos e-
iusdem mortui perenni parētemus gloriæ. Hac
quoq; de causa, nunquam satis laudari potest Ni-
colaus Zebrzydouiſius, poſtea Palatinus Cracoui-
enſis, qui ſub illo terribili interregno, Stepha-
no Rege mortuo, cum rogaretur, ut apponeret
calculum alteri competitori Regni, cui ille cum
ſaniori parte, erat contrarius, (nam tanti viri ac-
ceſſione, ſumam quoq; rei, ad eundem compe-
titorum peruētura credebatur, & ea propter inæ-
ſtimabilia munera, ſed longe maiores pollicita-
tiones, interponebantur) fertur reſponſiſſe. Par-
ricidium ſibi videri, ea præmio facere, quæ ne-
quaquam faciendi haberat animum. O virtutem
præclaram, ô reipublicæ amorem, virtuti forte
hoc non obſuiſſet, ſed quia reipublicæ obſutu-
rum credebatur, abiicit. Non inquam ſcleratus ci-
uis, ſed hoſtis eſt reipublicæ, ille, qui viros ma-
gnos & prudentes Senatores, gloria non venera-
tur ſicut & qui viuorum ob felicitatem non exul-
tat. Et vero accedis ad Cracouienſem diæceſim,
accedis inquam, ad conclaue ſummorum viro-
rum, quiſquis enim magiſtratu quopiā (cum ſint
diuerſi

diuerſi) huius Palatinatus condecoratus eſt, ma-
gnam autoritate, magnum iudicio, magnum vir-
tutibus, eſſi ad rem pertinet, magnum genere eſ-
ſe deprehendes, & iure merito ipſorum albo in-
ſcribi debes, ut vno quaſi palatio includaris. Ita
equidem eſſe debebat in primario Palatinatu ſe-
lectiſſimum eſſe magiſtratum. Intras ad illud Ca-
pitulum quod & tuæ diæceſis Senatus ampliſſi-
mus & in quo ampliſſimorum Senatorum reipub.
ſunt filij: caput ipſorum factus es, qui ſeminari-
um ſunt Episcoporum & flos ſelectiſſimus Sacri
Ordinis: magna igitur tuæ Cathedræ maietas,
amplitudo, ſanctitas. Circa eam deprehendes
Patres Venerabiles integritate, honeſtate, erudi-
tione, doctrina conſpicuos, ſenio reuerendos, in-
ceſſu graues, aſpectu verecundos ac venerabiles
in ſermone ſuaues, in prædicando admirabiles,
&, ſiquid, hoc in primis & maxime deſideratiſſi-
mum eſſe deberet. Enimvero præeſſe viris bo-
nis magna eſt voluptas, longè maior gloria: vnū
etiam habere bonum virum aliquando ſufficit,
ſemper tamen prodeſt. Hoc igitur tibi præcipue
gratulandum eſſe videtur, ſi vnum bonum ac

optimis similem sis habiturus, non quod vnus sit
tantum, plures enim sunt, omnes autem esse cre-
duntur; sed vnum habere de quo nulla suspicio
vel opinio mali fuerit hoc dico maximum est, ijs
enim sæculum hoc, est moribus, vt cum pleriq;
sint tamen sinistrè interpretantur, felices igitur
illi qui & sunt & habentur, Deo & hominibus ta-
les sunt gratissimi, iucundissimi, amantissimi.
Quia verò nullam alteram, hac habere potes, nec
quidem habebis voluptatem, hoc tibi gratulor,
magnum enim inde animi solatium es reportatu-
rus, diuersando cum mente mali ignara scelerisq;
pura. Verumenimvero offert se alter & is latissi-
mus gratulandi tibi campus à quo verè potest pe-
ti gratulatio, eaq; & iusta & competens, & cum
primis consideratione dignissima, nimirum quod
te Deus Maximus non tantum præuiderit, quod
& reliquis hominibus commune est, sed destina-
uerit etiam, atq; his rebus præfecerit, gregem tibi
eum pascendum & commiserit & concrediderit,
te inquam solus Deus ad hoc vocauit & destina-
uit. Si ita est magno applausu excipiendus esses,
nam si principibus placuisse viris non postrema
laus est,

laus est, Deo placuisse ingens est gloria. Sed fortè
hoc non constat, forte aliqua obijcit se ambigui-
tas, præsertim si omnibus idem non euenisset? vn-
de igitur eius rei depromemus argumenta, hoc
itaq; dicere aggredior, hoc comprobare, quod si
fecero, rem magnam efficiam cunctosq; ad gra-
tulandum tibi acclamabo, conuocabo, inuitabo,
Te igitur destinatum huic Episcopatu à solo Deo
deduco. Neq; institutum meum neq; ratio di-
cendi postulat, vt agam de prædestinatione, alie-
num enim id à meo est proposito nam & ipsum
verbum alijs præter Theologos est inusitatum &
ab occasione hac dicendi, alienissima ista mate-
ria, nimirum quâ ratione aliqui fuerint, præde-
stinati ad gloriam, circa quosdam, nulli habiti
actus, hæc enim omniū maxima difficultas, quam
iure merito S. Mater Ecclesia, ab ingenijs huma-
nis ablegauit ne scrutatores maiestatis opprime-
rentur à gloria, emergebat enim hinc plus erro-
rum & impietatis, quam veritatis & doctrinæ e-
ruebatur, non hoc igitur volo, non hoc dico non
hoc contendam, sed quod erui potest ex rationi-
bus propemodum veris, quid velit Deus quid no-
lit, quid

lie, quid præordinat, quid permittat tantum. Atq;
primo omnium Philosophorum, quotquot an-
tiquitus fuere (illi enim inprimis appellandi mihi,
qui natura duce, nullo fulgore fidei illustrati Phi-
losophati sunt) ij omnes vnanimi consensu, vno
ore, quasi eadem lingua, eodem spiritu Deum
summè bonum, ipsamq; bonitatem esse volue-
runt, atq; concluderunt. Vnus erat qui duos,
cum posuisset deos, alterum bonum, malum al-
terum appellauit. Quid ineptius? quam prauita-
tem & nequitiam humanam Deum appellare?
non absurde enim, pars non postrema modernor-
um sapientum asserit, malum nihil aliud esse,
quam carentiam boni, qua de causa summum
bonum esse, summum malum nequaquam esse
posse existimant. Qua sapientia, quid subtilius?
quid pulchrius? quid rationabilius? hic inquam
vnus, & ceterorū, abiectissimus homuncio delira-
uit, cū nec albū nigrū, nec Deus malus esse possit.
Recedamus ab hoc spurcissimo, & profligatissi-
mo heluone neque enim homuncionem voca-
bo, quia ultra stultitiam delirauit. Reuertamur ad
omnes rectius philosophantes. Summè bonus
est Deus

est Deus, quia quotquot bonitates sunt siue pu-
blicæ, siue priuatae tam sacre quam prophæ, om-
nes à Deo tanquam ab illarum fonte, dimanant
diffluunt atque dilabuntur: summè bonus Deus
est, nam per eum nemo vnquam fuit miser ne-
mo deploratus, perditus nemo; nostra non
diuina, nequitia attulit, & affert nobis eas quas
tolleramus calamitates: Nō dij attulerūt Priamo
eam infelicitatem cum mortem filiorum excidiū
regni, ruinam vrbs videret, sed adulterium filij:
Nō dij intulerunt eam vim Tarquinio, cum re-
gno exturbaretur, sed ipsius ambitio, superbia
maleuolentia: non Dei aliqua inclementia noster
Boleslaus excidit regno, sed illius crudelitas, &
sanguinolentia, cum pepulit, eiecit, euerit. Ne-
mo vnquam per Deum fuit miser, sicut viceuersa,
nemo felix sua mediante voluntate. Suo vnus-
quisq; arbitrio potest se periculo committere, at
verò posse elabi, diuinum est opus: facile quiuis
miser, felix nemo, nisi Deus voluerit esse potest.
Quot sunt qui sibi exitium, ruinam, calamita-
tes, pauperiem, vel cruces diuersas pepererunt,
quot sunt qui non modo sibi, alijs etiam calami-
tates

rates intulerunt? quot sunt qui diuersis diuersorum malorum, causæ & initia extiterunt qui tamen à se ipso habuerit felicitatem. hucusque fuit nemo. Aliqui forte, quamuis pauci. At hoc quomodo in vnus, si non quoque in reliquorum esset potestate, cur non in eorum etiam, qui eandem apprecantur, inuocant, implorant. Deus pelagus est omnis felicitatis fons & origo bonitatis, diuinitas ex beneficentia illucescit, è cælo igitur omnia bona omnis felicitas, qualibet beatitudo, occasiones quidem conquiruntur à nobis, conquisitæ arripiuntur, arreptæ detinentur, & amplectuntur: spes tamen vel potius res ipsa fugit, & auertit se aduersa, omnes spes alit, sed non paucos fallit. Atque quia à Deo, non spes fallax sed ipsa habetur felicitas, nihil quod nobis boni obtigit non è cælo nobis esse datum destinatumque est existimandum. Quidquid igitur boni habemus, è cælo id acceptum esse, à Deo id sibi datum quiuis sciat, credat, fateatur, neque enim aliunde bona, felicitasque haberi potest, quidquid verò mali, non aliunde quam à nobis, à nequitia, sceleribusque nostris id promanasse nouerit oportet.

Et hæc

Et hæc magnorum virorum & celebris & docta & maximè pia sententia est. Quomodo igitur Te à Deo datum esse nobis non existimabimus? cuius virtus, pietas, prudentia, iudicium magno commodo vniuersis futura sunt, magno fructui ingenti vtilitati. Et quidem virtus ingens bonum ab omnibus exoptandum & amandum ad quem non peruenit? quem non tangit? quem non afficit commodis, voluptatibus, felicitate? & quamuis hæc sit natura vniuscuiusque bonitatis quod dilabatur & in omnes diffuat, virtus tamen id habet peculiare, vt non tantum ijs qui illa sunt præditi, sed quibus cum illi versantur, viuunt, cohabitant, non parum prodesse soleat. Sed fortè non omnibus planum est, plurimos latet quid sit virtus? nemo rem vidit, pauci quid sit audierunt, multo pauciores conceperunt, vix aliqui sunt qui didicerunt. Prodesse omnibus, ista est virtus, quæ tot gentes ab interecione liberauit, quæ tot Respublicas à seruitute saluauit, quæ tot vrbes ab excidio conseruauit, quæ tot homines à calamitatibus vindicauit. Hoc tempore nemini nocere satis ingens virtus

D est, hoc,

est, hoc pro summa reputatur virtute: & in ijs
sæculi moribus beneficij loco est, non excruciar
ab ijs qui eo potentia deueniunt, si tamen be-
neficiū vocandum, cum latro dum possit non
ademerit vitam aut prædator sarcinas vel opes
quasuis. Virtutis nihilominus est adesse, prodes-
se, opitulari, auxilio esse omnibus: at iniurias non
prohibere, miseris non subuenire, societatem est
prodere humanam, leges violare naturæ, quas
nobis natura obseruandas indidit, ingenerauit,
& quas deserere magnum est crimen. Necessita-
tes, pericula, calamitates reipublicæ, vberri-
mè nobis tuam patefecerunt virtutem, quam tua
præsentia recreauisti, opibus iuisti, laboribus sub-
leuasti, & quamuis labores graues sint, consili-
um non omnibus obuium, complures tamen
consilio prodesse malunt, pauci facultatibus: mi-
nima enim est cōsiliij iactura, immouero quò ma-
gis impenditur eò plus conquiratur: pecunia se-
cus, quanunquā alijs sine damno quiuis inseruiuit.
Bonus est qui consilium dederit optimum, sed
qui & mediocres pecunias, is optimus est habē-
dus. Virtutem cum pecunia, famam cum diui-
tijs, est

tijs, est seruare difficile: nam quemadmodum
vmbra lucem auersatur, nox diem pellit: ita vir-
tutem cohærere pecuniæ, incredibile est, nisi eā
nostram magis audiuerimus, quam sentiamus e-
amque publicæ accōmodare vtilitati parati fue-
rimus: est enim colligenda vt ea reipublicæ, cum
necessitas venerit, profuerimus, multi se & pa-
triam perdiderunt, qui suas publicari opes detre-
ctauerunt. Sed hoc quid est? virtutem ne laudo,
an te virtute ornatissimum? virtus cur laudanda
quam nemo sceleratissimorū vituperauit, repro-
bavit, contempsit, res manifesta est, nisi lucem in
meridie quæsiuisse videatur. Si Te virtutibus or-
natissimū deducere cōtendo, eius rei non ero au-
ritus testis, dicam, qui oculis suis magna tua be-
neficia in Rempub. in Ecclesiam, in pietatem, in
domos sacras, in religionem viderunt. Partitus es
beneficia tua ne vnum in locum redundarent, sed
quantum debebas reipublicæ dedisti: Ecclesiam
tua liberalitate plurimum ditauisti; nobile Colle-
gium Sacerdotum, dotauiisti, crexisti aliqui: no-
ua tanquam cito ruitura: tu & collapsa amplius
ne corruerent refecisti, atq; angustiora reddisti.

Quâ ex liberalitate tua facile quivis coniecturam
facere potest, qualem in cæteris virtutibus te præ
stiteris, si talem in pecunia collocanda expenden-
da, id enim hoc tempore difficillimum est, mul-
tis se offerentibus exemplis corradendæ & asser-
vandæ pecuniæ, neq; extra familiam exportandæ:
Vbi nihil referre existimatur, si nudus Christus
ante fores ploret, dum amici, fratres, nepotes, in
palatijs gaudeant, si pauperes fame moriantur, cū
agnati luxuria diffluant. Verum boni viri est re-
cto iudicio, non peruersis inniti exemplis, ne se-
quendo alios à seipso recedere videatur. Accedo
ad Tuam incredibilem doctrinam, quam si mecū
reputo tanta est, quanta meo rudi calamo deline-
ari nequit. Nosti optimè Illustriss. & Rndiss. Do-
mine posse depingi corpus, posse & affectiones,
ex certis enim signis ad certa devenimus signata:
sic illa facies, quæ sculpta Hannibalis Romæ in
in palatio Farnesij visitur, truculentia documentum
est id enim & oculi prominentes & nasus
aquilinus edocet. Sic Pompeium magnum effi-
gies, urbanum hominem, elati tamen animi, ex
aliquorum habemus coniectura: Neque à vero
procul.

procul, ita enim res ipsa edocet: quid plura?
pars ista Philosophiæ est. E scriptis etiam, mores
scriptorumprehenduntur, iudicium tamen &
doctrinam assequi sola inspectione, haud possibi-
le est, abdidit enim hoc natura in secretissima
penetralia, res enim pretiosæ ita asseruari solent.
Doctrinam Tuam comprobarunt Tua iudicia sa-
pientissima, decreta sacrosancta, decisiones admi-
rabiles, ista vehementissimè Tuam commendant
doctrinam commendabuntque. Enimuerò Tuis
sanctissimis decretis, quod ius expressè non tradi-
dit Tu tradidisti, qua re iuris peritorum chorum,
ita illustrasti ut amplius non ad suorum librorum
tenebras sed ad lumen Tuarum enodationum o-
mnes confugiant & se referant. Si licuisset com-
memorauissem aliqua, sed quia aliqui comme-
morando perstringendi mihi fuissent, consultò
præmittò, etsi enim fauores captare omnibus
liceat, odia tamen euitare omnes tenentur, si id
absq; publico dispendio esse potest. Nec mirum
si eo perueneris, nam si iustitia in se virtutes com-
plectitur omnes, quomodo non Iurisprudencia,
cuius Tu non imitator sed auctor, doctor, & ex-
posito-

posito res? Non nobis tantum, exteris etiam, non iniucundus est liber quem tu in hac materia conscripsisti. Aliqui autores historiarum extitere, sed hoc quid est? expuere in cælum, etenim & veritas odium parit & falsò quidpiam prodere, est decipere omnes, à qua re, verecundia tam sceleris, quam conscientiarum abduci debemus, quod Historico familiare est crimen. Tu & Tibi gloriam peperisti, & omnibus ingentem utilitatem attulisti. Verumenimverò, quid ad rem doctum esse? sapientem esse? cui bono, iam enim eousq; malitia & impudentia huius sæculi profecit, ut aliqui id quærere non vereantur. Ecquis est tam stupidus qui ista non intelligat? & priuatarum & publicarum, & sacrarum & profanarum commendant literarum sapientiam, ut quæ sola sit, quæ post mortem, etiam nobiscum sit mansura in cælis, magni doctoris Hieronimi ad Paulinum ista sententia est, esse discrimen simplicis à sapiente in terris, maius fore in cælis. Nobis igitur tantum re literaria, Reipublice minime prosumus, nobis, non patriarum gloriam conquirimus, noster non publicus inde honor est. Magna est vis doctrinarum magna, ingens est,
nam

nam ubiq; diffundit suos radios, splendorem, & lumen, discutit tenebras ignorantiarum, indicat fortunarum instabilitates vitæ humanarum, & rerum inconstantiam, edocet in quibus consistat felicitas: quæ res, quæ gloria, quis labor, quod exercitium, quæ vitæ conditio, quam sapientia clariorem, splendidior, augustior non reddiderit? Sponte semper sapientibus obtulit se felicitas benignam, ni sperneretur: plures virtute contenti, diuitias tanquam irritamenta malorum contempserunt, tum se locupletissimos censes, cum non opibus creuissent, sed de cupiditatibus plurimum detraxissent: aliqui eas sine cupiditate, retinentes, magis suas audiunt, quam sentiunt, retinent enim opes ut egenis qui ijs indigent benefaciant, prodesse enim alteri quibus dum modo possit teneretur. Neque verò diuitiarum in manibus viri sapientis malæ sunt, quæ in manibus viri profligati pestis esse consueverunt, non enim asserimus paupertatem, diuitijs meliorem, sed securiorem, & faciliorem. Magna verò est ista peruersitas, sollicitum esse, circa eas res conquirendas, quæ magnis impensis factis, in-

etis, incertum si haberi poterunt, illud verò negligere quod sine sumptu, sine labore, sine periculis nobis obuenire potest, & quod est securius. Verum huius sæculi hoc vitium est, omnes curamus ut diu viuamus, quum tamen diu viuere nemo potest, omnes possunt benè viuere, hoc tamen vix est qui curauerit. Sed nos vnde sumus digressi reuertamur. Non tantum illis gloriosa est sapientia, qui sapientes sunt, sed & illis, qui hos retinent, atque apud quos diuersantur, non mediocrem conciliat gloriam. Prius nostra patria dulcissima, re Academica quam, militari, mundo inclaruit, non ita? puer est qui ignoret, Polonorum primam esse mentionem factam tum, cum celebritas Academiae innotuit, si nos cum barbaris, si barbari simul nobiscum reponebantur, est incertum, Poloniae antea nullā, tunc celebris esse incepit mentio. Hæc prima occasio fuerat nominis Polonici inclarescendi, hæc æstimationis, hæc gloriæ, quam rem perspectam habens Rex Stephanus de ea augustiori reddenda studiosissimè cogitabat, morte tamen præuentus, Rex & vita longiori & gloria immortali dignissimus, quod ex animo optabat

optabat non perfecit. Dania armis minus, re literaria & studio Tychonis, gloriosissima effecta, minus quidem utili, sed ingeniosissima rerum cœlestium cōtemplatione, quomodo ob centrorum variationes, diuersitas motuum innotescat. Ille est Tycho qui primus cometas posse incendi supra solem asserere ausus est, quæ olim impia fuit, nunc certissima sententia est: Ille qui primus Martem in ima abside inferiorē esse sole demonstra-uit. Sed ista omnia ad fallēdum tempus per quam iucunda, publicis necessitatibus accommodari nequaquam possunt. Maiores gratiæ agendæ iis, qui nobis primi regulas architecturæ militaris tradiderunt, vel potius alta caligine obductas, luci & vsui restituerunt, siue ij Holandi, siue quipiam alij fuerint, rem enim omnibus gratissimam, & vtilissimam præstiterunt, reformata militia, quæ propter suam leuitatem, nec hostibus grauis esse potuit; cum ad bellum non armati, sed plumati ire consueuissent quorū superbia execrabilis nuper, tanquam vtres vacui supra aquam se ostentando enatauit: modò instructissimi sunt ad infinitas hostiles copias defatigandas, & tempore

E frangen-

frangendas, vel nullo vel exiguo sumptu, quod maximum est. Non desunt amplius bonis Imperatoribus modi hostes oppugnandi tot, quot ab hoste defendendi excogitantur, ingenio enim hominibus decertare conuenit, non semper viribus, brutorum enim hoc genus certaminis est, quæ, ab hominibus omnia, ratione superantur; plures consilio vincuntur quam armis. Neq; conicias, instructum hac gloriosissima scientia debere esse virum Ciuilem, tanquam publicis rebus utilissimum. Sed quid hoc ad Tuam sapientiã, sine qua, nec pauper nec diues, nec senex nec iuuenis, nec miles nec togatus esse potest, dico de iuris cognitione in qua Tua dexteritas admirabilis, quæ & omnibus, & semper, & ubiq; utilis est. Nemo verò sua scripta cum tuis conferat, scripsisti, non propter otium honestum, vel solatium animorum, sed propter utilitatem vniuersorum, non huius vel illius Magistratus causa, sed omnium Magistratuum vniuersim, non his vel illis hominibus, sed vniuersis, non priuatis, publicisue, sed vtriusq; tuum inseruit opus, nec tantum domesticam vel vt dicitur togatam affert sapientia gloriam,

riam, res literaria & bellicis rebus plurimum confert: nemo rectè tractauit arma qui nunquam calamum. Delirant aliqui, sapientiam à re militari seiungentes, vna Dea Pallas & scholarum & bellorum est: multa huius generis vulgus, sine sale, vt vulgus. Tantum quæuis natio bellica laude claruit, quantum sapientiæ habuit, omnibus literæ attulerunt sapientiam, pluribus ingenium, suppleuit experientia. Quis ignorat Epaminundam Thebanum in Academia semper, in castris nunquam versatum? Is tamen patriæ cōmotus calamitate, è ludi magistro gloriosissimus Imperator, duobus summis victorijs, nunquã è memoria orbis excisuris, summos quosq; antegressus est Imperatores, nō modo euerfis Lacedæmonijs, sed ipsorum imperatore Lysandro victorijs exercitatissimo, occiso. Quis ignorat Paulum Æmiliū ludi magistrum vicisse Perseum, subiugauisse Macedoniam, euertisse regnum hostium, quod multis annis viri militares prestare non poterant: & quanquã is rebus gestis clarissimus, clarior tamen quod manus continentissimas haberet, qui illata vi incredibili diuitiarum in publicum ærarium, ita

um, ita illud ditauit vt ad Pansæ & Hirtij tempora quibus temporibus omnium maxima gerebatur bella sufficeret, ipse ne teruncio quidem factus est ditior. Olim enim gloria non auro domos suas exornare Imperatoris erat, laude non opibus superare reliquos, sua publica facere aliena non attingere: olim bellis ditabantur populi, in pace tenuiores fiebant. Non commemorabo hoc loci Aphricanum minorem, qui euerfa Numantia, Carthagine deleta, opulentissimam fecit Rempub. ipse quo sepeliretur sibi nihil reliquit, hic nihil vnquam emisse, nihil vendidisse, nihil ædificasse traditur: pluris æstimabatur, apud antiquos, mediocris gloria, quam magnæ opes. Vnus erat Spartæ Gilippus, qui cum non idem, quod boni imperatores solent fecisset, vno publicæ pecuniæ furto, multis clarissimis victorijs partam gloriam amisit vt rei atrocitate commoti ciues, laqueo strangulandum mandauerint, apud quos plus odiû huius nefarij sceleris, quam rerum gestarum gratitudo valuit. Quid plura de cæteris. Nemo clarus qui non doctissimus imperator. In Alexandro Magno plus valuit ingenium quam

um quam in Dario & mille alijs, militaris experientia, puer enim è literario ludo, maximus ingenio, viribus inferior, nouit superare Reges, euertere regna, expugnare vrbes; Hunc si non superauit, certè par illi factus Cæsar, non minus clarissimus quam doctissimus Imperator. Quid de Pompeio M. & Octauio Augusto dicam? hunc Antonius, illum Carboniani puerum contumeliosè appellabant, quos viros experti sunt: Non ambitione, neque arrogantia, sed ingenio hostes vincuntur, fortitudine inimici. Et Solimanum prætermittere non licet, (etiam in hoste virtus laudanda) is vnus Turcarum potentissimus vnus & sapientissimus, qui Iulium Cæsarem suum in bellis gerendis fuisse pædagogum solebat dicere, qua de causa eiusdè commentaria, barbarâ docuit linguâ, barbarus quidè sed nō barbarè indicauit, quod inane præfidiû stultus imperator. Et noster Tarnouius vir & ingenio summus & laude bellica clarissimus, prout eruditione omnes superabat & ingenio, ita huc vsquè bellica gloria à nemine suorum superatus est ille omnium Princeps: quantum verò js possit ingenio, quanto opere bellica

bellica laude præclarus, ab exteris depromendū
est, cum nulli apud nos scriptores publici sint in-
stituti, magna & virorum præclarorum iniuria &
Reipublicæ detrimento, subtractis & bonorum
exemplis & malorum infamia. Alibi Mars non
fauet nisi ubi Musæ suam collocauerunt sedem,
in Græcia olim, postea Romæ, nunc in Hispania,
hæc ignota paulò ante, nunc, & ingenio admira-
bilis, & bello clarissima. Sed quid in re manife-
sta elaboro? non proteruius sed rudis, non rudis
sed stultus & sine ratione fuisset, qui eam rem
non concessisset, ingens bonum, Senatorem ha-
bere prudentem, doctum, de re literaria optimè
meritum. Tu Illustriss. & Reuerendiss. Domine
talis es, Te propter sapientiam collaudauerunt
omnes nationes, Te amauerunt Tui, Tibi cedunt
æquales. Bonus igitur tu es, à Deo igitur destina-
tus tu es, qui omnia destinat bona. Atque quæ
dixi nulli arbitror faciunt suspicionē, secus enim
sentire impietas fuisset. Bonum verò te esse Rei-
publicæ, quid certius? hac vnâ re adhuc compro-
babo, quia salutem Reipub. gloria domus Tuæ
antiquiorem habuisti, tanquam hanc sine illa nō
duratu-

duraturam, illam sine hac vtcunq̃ue. Ita né? Ita
equidem. Cum tuum nepotem Viennæ in aula
Cæsareæ Maiestatis reperissem, iuuenem heroicis
virtutibus ornatissimum, ab eoq̃ue cur se, ad te
non cōferret quæsiuissem, libenter inquit ille fe-
cissim, nisi aliter Patronus meus ordinauisset (te
intelligebat Illustriss. Dñe.) expectat me in Polonia
fortuna, si bene instructus rediero. O prudentiam
inenarrabilem, ô iudicium incredibile, ô bonam,
ô felicissimam Reipublicæ fortunam, quæ tales vi-
ros habere meruit, hoc enim vnum ad salutem
Reipubl. cuiusuis maximè est necessarium, vt nō
amicitia, sed dignitate honores atq; magistratus à
quouis cōsequatur. Quod si omnes publicā pon-
derarent salutē, non suam existimationem, non
tanti euenirent, quanti contingunt in Rebus pu-
blicis errores, hinc enim & maxima & certissima
Rebus publicis euenit infelicitas, cum viri prima-
rij, cupidoiores sunt retinendę dignitatis, quàm pu-
blicę salutis. Hæc res Florentinorum euertit li-
bertatem, dum primates non quòd salubrius pa-
trię, sed quod suis familijs honestius arbitraban-
tur, id in conferendis, honoribus considerabant.
Multa

Multa allata, sed multò plurà afferri pòtuisse nt,
tuę bonitatis argumenta, quę ab amore, à libera-
litate Tua in Rempub. à sapientia Tua omnibus
proficua, peti possent, & quidem non illa popu-
lari, sed cùm quā pręstantissimi contendunt, quā
inferiores mirantur, omnes venerantur, vt affir-
mare audeam, Cathedram hanc tanquam tripod-
em illum ad te sapientissimum, veri Dei non A-
pollinis iudicio delatam fuisse, neq; enim locus is
vulgariter eruditum, sed eruditissimū exposcebat.
Et quia omnia à Deo hominibus deputari con-
stat euidenter, quomodo Tu deputatus & desti-
natus nobis, Patrię, Reipublicę, fateri nō debes?
cum nihil boni pręter diuinam voluntatem ho-
minibus euenire possit. Afferam alteram non
quidem planiorem, nam quę dicta sunt, ipsa lu-
ce sunt clariora, sed vt deducam rem veram,
vndiq; deduci posse, nam si reticuerimus verita-
tem enatat illa, si comprobamus illa non verior
lucidior tamen est. Quam primum mortuus est,
anteceffor tuus, omnium penitus votis affecti-
bus, consensu, desideratus inuocatus atq; ex-
pectatus, ab omnibus inquam tibi hęc amplitu-
do, ab

do, ab omnibus sedes ista delata est, qui te non
desideraret, qui te sibi pręfici nolit, qui te pasto-
rem sibi dari, non exoptaret, fuit nemo. Fuit ne-
mo? atquiné Iuppiter placet omnibus, omnibus
placere difficile est. Crede mihi, nemo aduersa-
tur ijs, quę fiunt diuina voluntate, & decreto,
pueri quoq; quamuis rem non concipiant, diuinis
morem gerunt decretis, quis vnquam à quopiam
sede vacante, appellatus pręter Te? quis nomi-
natus? quis desideratus? Te & senes, & iuuenes,
& Clerus & sæculares communibus suffragijs,
futurum Episcopum designauerunt, delegerunt,
ad noticiam omnium deduxerunt, pueri etiam,
hunc, tanquam lætissimum nuncium circum-
tulerunt, Te futurum Episcopum Cracouiensem,
cum tibi tantū abest de morte, sed ne de ægri-
tudine antecessoris tui constaret. Rarus iste ca-
sus, nec absq; miraculo fieri consuevit. Anno re-
center elapso in numerum sanctorum relatus Di-
uus Andreas Carmelitanus, cuius inter vitę mira-
cula, & hoc non postremum esse censetur, quòd
sede vacante Fessulis, non modo populi vniuersi
consensu, sed puerorum etiam applausu, & vo-

tis, nominatus Episcopus esset: Dei est voluntas,
cui nemo refragatur mortalium. Qua ex occa-
sione duo mihi soluenda occurrunt. Alterum qui-
dem quod te complures Administratorem huius
Dioecesis dignissimum recordentur, Cancellari-
umq; Regni, quibus iustitia tua singulari com-
mendatus es incredibiliter: alterum, quia ordine
quodam, propemodum necessario, te ista ampli-
tudo tangebatur, unde omnes te, & non alium fo-
re Episcopum, coniecturam sumebant. Ad pri-
mum, est quidem verissimum, te laudabiliter ad-
ministrauisse Tuam Dioecesim sine fastu, sine ar-
rogantia, & præter omnium querimonias: terra
Seueriensis id testatur vberime, quibus, cum ius-
tus esses, acerbus non fuisti, arrogans non vide-
baris, contumeliosus non habebaris, Patronum,
non Iudicem Te esse ipsorum demonstrabas &
certè quid amabilius iudice, affabili? quid iu-
cundius domino ab omni ambitione alieno. Cre-
de mihi in plebeis animis satis arrogantia, super-
bia, contumelia: nec pati nec facere contu-
meliam est heroici animi, ubi plus arrogantia
ibi generositatis minus. Te igitur Tuaq; experti
iudicia

iudicia vniuersi, nemo erat, qui oppressus iniqui-
tate iudiciorum abs te causam suam exaudiri non
exoptaret, id enim erat tui officij cum Cancellari-
us fuisti, abs te tam inferior quam superior cau-
sa, summa cum animi tranquillitate abscedebat,
alter quia suum recuperauisset, alter quia alie-
num reddidisset, tanta erat Tuorum iudiciorum,
autoritas, fidesque, ut mirum non videretur,
si vniuersorum fauores, hac in re prouocares.
Sed non raro iustitia homines, Deum tamen nun-
quam offendit, obsequium amicos veritas odium
parit, ecquis est adeo puer qui ignoret ut quod quis-
que iustior eum plus malorum expositum odijs.
Id tamen credo, id fateor, id affirmo, Te nunquam
potuisse ab omnibus nominari, nisi voluntas & de-
stinatio id effecisset diuina. Quid verò ad alterum?
iure ordinis consecutus es eam dignitatem que
præterijt plurimos ex eodem loco vel ordine.
Ex ordine consecutus hanc sedem? quomodo
esse poterat ut ambire eandem aliqui haberent
animum? ecquis nam fuisset qui eam ambiret si
ei loco debebatur, cui tu præsidebas: insipientis
est velle eripere triumphanti palmam, regnanti

coronam, successori hereditatem, non igitur iure ordinis, sed Dei optimi beneplacito eam possedisti, summam igitur consequutus es & nominis amplitudinem & loci maiestatem, & dignitatis eminentiam, Dux Seueriensis factus es, non mediocris ista maiestas: Senator primarius inter Episcopos, magna amplitudo, præstantissimæ Diocesis Præsul, ingense eminentia, præter enim officium quod sanctum est adest tibi in republica per ampla auctoritas, & potestas. Hac magnitudine, sunt aliqui qui commouentur, maximè verò cum videant ad eam potentiam & amplitudinem accessisse Tuam eruditionem incredibilem, iudicium summum, magnanimitatem insuperabilem, ista non mediocriter aliquos conturbant; quid? commouentur quia ornaris tanta amplitudine qui te ipsum virtutibus ornatissimum fecisti? Illi dico commouentur, quibus cum egestas ludibrio esset, attamen S. Petri deprædicant paupertatem, quasi vero placeat eis illa, non verò potentiam exhorrescant Ecclesiasticam quæ è paruis initijs eò usq; fastigij erat peruentura, ut inuitati ad illud diuinum conuiuium venire nolentes: haberent
per quos

per quos attraherentur cogerenturque intrare, quis hoc facere poterat si non potentior? Magni veri pagina est Ecclesiā Dei grano sinapi esse similem, quod in principio sui exortus adeo exiguum est ut sensum fugiat. Audite inuidi ne contabescatis, attendite maleuoli, ne ante tempus crepetis; semen sinapi exiguum est, excrescit tamen hoc apud nos in frutices non mediocres, in calidioribus terris plane in arbores frondosas, & quod nuper contemptui erat omnibus, postea & hominibus aduersus solem & auibus contra volucrum rapaciorum incursum receptaculum est: hoc modo excrescere debebat Ecclesia Dei, ad eam amplitudinem erat peruentura, in qua vidimus iam aliquos nunc te videmus qui reliquis propter auctoritatem æqualis, propter virtutem & sapientiam longe potentior. Hoc igitur si illi sciuisent cur non tacerent? si ignorant cur insultant? cur expuunt in calum? creuit, excreuit, maturuit, quæ & nunc sancta & olim minus potens fuerat Ecclesia Dei. Nemo igitur commoueri debet tuo splendore, tua magnificentia, tuo apparatu, & dignitas enim tua id meretur &

autoritas qua polles id expostulat vt Ecclesiæ potentia inclarescat, atq; ab vniuerso orbe cognoscatur iam creuisse & maturuisse hoc sinapi in sui initio minutissimum: quisq; intelligat iam esse messem, iam amplius thoris, napellis, cicutis alijsq; herbis venenosis non licere esse. Ecquis est in toto orbe Christiano qui fidem Catholicam non didicisset? Ecquis est qui parentibus vel maioribus suis Catholicis natus non fuisset? Ecquis est aduersæ Sectæ qui aut per se, aut per suos maiores fidem Deo & Ecclesiæ non dedisset? ad quā retinendam, seruandam, præstandam soli Iudæi & gentiles cogi non debent, ijs enim nati sunt parentibus, qui nunquam à fide data Deo & Ecclesiæ transfugerunt & recesserunt. Quis igitur illos transfugas impios & periuros homines ad obedientiam Dei & Ecclesiæ reduxisset, quis ad præstandam fidem & obedientiam coegisset, nisi tantum potentiæ Ecclesiasticis destinatum & concessum fuisset. Iam messis est iam maturuerunt omnia, iam Ecclesia Dei peruenit ad eam magnificentiam, vt Præsules autoritate superent viros primarios, potentia Principibus æquentur, magnum

gnum hoc Ecclesiæ Dei est argumentum magna comprobatio quod Dei sit num quæ piam illarum quæ pro Ecclesijs haberi volunt, eò usq; potentiæ deuenit, vel peruentura est? non homines verum ipse Deus non patietur ista, non feret, non permittet. Desinant murmurare, desinant obtrectare, desinant carpere Pontificias autoritates, dignitates, magistratus diuinos, quibus rebus complures vidimus defatigatos, lassatos, atq; nimia sollicitudine à viribus penè destitutos. Sit nemo hostis tuæ amplitudinis quam incredibilem tecum allaturus es, nam quemadmodum cæteros iudicio & doctrina superauisti, ita & amplitudine certum est quod superabis, pristinam augebis, huicq; dignitati, non parum ornamentis afferes, quæ pietate & probitate virorum bonorum hucusq; propagata, ad eam quam nunc habet, peruenit maiestatem. Verum enim vero nec doctrina ita infelix est quod omnes non debeat afferre felicitates, nec ita felix quod aliquam apud male iudicantes non incurrat notam, sicut sol qui concoquit humiditates, verumtamen in calidioribus regionibus ita concoquit vt etiam ea ex concoctione,

etione, fragrantissimum arboribus conciliet odorem, in his partibus secus in quibus humidum viscosum valde & impurum concoqui non potest, fætorisq; aliquantulum odoris nihil ingerit, quod non propter solem sed recipientium naturam fieri oportet. Eodem modo effecta doctrinæ, prauo aliquimodo accipiunt, rem aliter quam sit concipientes: quod apud rectè sentientes est iustitia, peruersè existimantes austeritatem interpretabuntur, doctrina iudicium, iudicium iustitiam gignit, quæ seueritatis apud quosdam iudicium est. Cur ita, doctrina comparat iudicium, pietas commouet conscientiam, qui plurimum valuerunt pietate & iudicio: non absq; illa affectione, quam communiter commotionem animi appellamus, esse poterant, ijs præsertim in rebus quibus non commoueri iniquum est. Summis laudibus celebrata peruenit ad nos austeritas Catonis, viri integerrimi, hunc alij crudelem, inhumanum alij appellabant, integritas enim eius tanta fuit, vt non modo aliquid indecorè facere, sed ne tollerare in reliquis, posset turpitudinem. Quis tam princeps, quem ille non obiurgauisset? quis

quis adeò amicus, cui pepercisset? quis tam potens, quem pertimuisset? magna illius in dicendo grauitas, in accusando vehementia, in iudicando seueritas, nec bonis tam graciosus, quam malis infensus fuisse perhibetur? quis Pompeio M. magnificentior? quis Iulio Cæsare bellicosior? quis Crasso potentior? omnium horum contempsit fauores, repudiavit gratiam, renunciauit amicitia, detrectauit affinitatem, ne aut fauor, aut gratia, amicitiaue illorum obfuisset sibi, ad liberè pro patria & libertate dicendum, ne proximior amicis quam patriæ efficeretur, & ne aucupando vnius fauorem, omnium proderet salutem & libertatem; Imo verò cum videret eorum necessitudines & nefaria cogitata nuptijs inter se firmari, clamare non dubitauit: cessate parricidio ciues scelerati, vestris lenocinijs summos prostituistis magistratus. Fuit namq; vir integerrimus, Philosophia Stoica instructissimus quæ in scelera rigidior erat, cuius multa Paradoxa tanquam crudelia Cicero pro Murena in medium attulit, vt ostendat non Catonem austerum, sed Philosophiam eius esse acerbiorē. Quid dicam de Ioanne

G

Chrylo-

Chrysostomò, qui propter seueritatem in diuersorum flagitia & Origenis asseclas maluit diuturna suffere exilia, quam non seuerus haberi, quia igitur parcebat nemini, à nemine non timebatur, à paucis itaq; non amabatur. Vnde ista? ex iudicio excellentiori, pietati iuncto. Et S. Nicolaum Mirrhè Episcopum fuisse vehementiorem, proditum est memoriæ ijs in rebus quæ impia illi videbantur, adeò vt Arianum de filio Dei impiè garrientem manu etiam cum verbis non posset cōpescuisset. Seueritas non semper mala, pars iustitiæ quandoq; esse potest, lenitas nunquam bona, & huic cum iustitia nihil, hæc & mala auget, & bona diminuit, illa mala prohibet, bona adauget; vel potius humanissimum dicamus & magnæ misericordiæ qui seuerus est ideo, vt malis scelera excutiat, bonos securitati restituat, & eosdem à horrore liberet. Lex erat Lacedæmoniorum reges seueriores essent tum propter allatam causam tum vt sua seueritate obseruatores suos attentiores & acerbiores sibi compararent, facile enim iudicem condemnamus, si eodem de crimine nos ab eo iugulatos esse senserimus. Le-

nitas

nitas crudelitati opponitur, vtrumq; coniungit seueritas, medium vt à Scholasticis ob participationem extremorum: virtus porro in medio consistit, & à malignitate extremorum tanquam in centrum detruditur. Non est seueritatis crimen pertimescendum in puniendis sceleratis & impijs: malè collocatum est beneficium parcere flagitiosis vel liberrime dicam grande est scelus, igitur animaduersorem esse in flagitio, seuerum in sceleratos virtutis est, qui seuerus in partrata non est, is innocentiam contemnit, innocentes prodit, sceleratis patrocinator: magnus horror seuerus iudex fontibus, sed maior voluptas innocentibus idem: Neq; pecunia nō frugi hominibus dāda, nec sceleratis misericordia præstanda, flagitiosi etenim vix morte à flagitijs cohibētut. Nō itaq; Tuis pōderatis virtutibus animiq; præclarissimis dotibus, sed nostra considerata felicitate quam nobis attulit & est allatura, tua hæc dignitas atq; amplitudo, hoc postremo tempore, cum fortuna melior Rempubicā expectat, exultamus. Iam Gallia toties quasi per periodos Platonicas ad sydera vsq; inclaruerat: iam Italia vni-

G 2

uerso

uerso orbi imperabat, iam Germania, cæteras nationes laude bellica superauerat, iam Hungaria multorum regnorum erat domina, finesque suos Padu vsq; terminabat, iam Hispania summorum quorumuis imperiorum adæquauit gloriã: magnum imperium Turcicum nondum labefactatum est: iam Persia, iam Græcia, iam Macedonia, sed cur infinitas enumerabo? ipsa Moscouia ad quam potentiam se se afferuerat? denique omnia regna summam gloriam iam sunt consequuta, ordo tangit nostram dulcissimam Patriã, cuius augmenti initium, prope modum in ipsis est foribus. Quæres vnde ista? Memini illius qui serio rebus contemplatis, semper eandem geri tragediam in mundo mutatis tantum modo personis sensit. Et reuolue illud bellum quod inter Pyrrhum & Romanos gliscebatur, immuta mare Adriaticum in Balticum, Tarentum in Elbingam, immuta cætera ad rem pertinentia, modum belli per similem fortunamq; reperies eandem vsque ad inducias in sexennium cum Romanis factas, cuius reliquum præmeditandum est, ne tanquam nihil suspicantes excipiat nos. Esto ad gloriam reipub.

reipub. id futurum, tamen & ad bonam fortuna se præparare nõ Romanorum exemplum docet, sed necessitas præcipit, vt cogitemus benè ante quid nos facere oporteat, nam quemadmodum facile corrui, qui ante pedes ipsos quo figat pedem non considerauit; eodem modo facile errat, qui facienda benè ante non fuerit meditatus. Pyrrhus iterum veniens à Romanis superatus est, ijsq; occasionem dilatandi sui imperij dedit, gloriæq; qua omnes nationes populosque superauerunt: et Reipub. idem est sperandum. ô felicem illam, si eo dignitatis est peruentura, est tamen in primis videndum, ne imparati excipiamus fortunam, multos ad quos veniebat fortuna præterijt, quia eos ineptos offendit: fata prouidere solent rebus publicis, viros magnos tum, cum fortunam clariorem imminere deprehenderint vt ijs ductoribus Reipub. fortuna in offenso pede decurrat. Concordiæ autem præcipuè habenda ratio, animorum verò dissensiones in idem velle & nolle reducendæ, vt sit reipub. charitas; maxima obstacula, charitatis semouenda esse, quis non existimat? pessima est res non discordiam, sed etiam occasi-


ones discordiæ non prohibere, Patres patriæ tales viri vocabantur apud antiquos, qui discordes animos populi reconciliauerunt, vel si reconciliari non poterant, ansas simultatum sustulerunt. Athenis cum inter Demosthenem & Æschinem graues controuersie essent, postea verò suorum sequaciū tumultus excitarentur, Reipublica quid inde esset sperandum præuidens, deliberatione facta, Æschinem ponderatis meritis Demosthenis proscribendum esse decreuit omnes dissensionum occasiones primo quoque tempore præcidendas existimans. Guelphi & Gibellini interitum Mediolanensibus attulerunt, à studiis ita denominati: magna incendia semper à paruis extiterunt initijs, graue nonnunquam bellum exortum inter Ducem Austriæ, & Confederatos propter quinque solidos, quia rem à principio parui æstimabant, donec magnam vim, hominum ferro, ciuitatum igni absumptam viderent. Magnā itidem rem præstaret is, qui primus legem de nō inferendis quæstatum publicum conturbare possunt, persuaserit, etenim illa ad tranquillitatem per quam fuisset utilis, ne vnus apud alterum suspicio-

spicione laboraret: sunt sacrosanctè iura Maiestatis custodienda; aliena nequaquam in consulto Senatu recipienda imperia, hoc enim non parū labefactat statum cuiusque Reipublice. Ista consuetudo laudabilis apud Gallos. Quid? consuetudo? Lex est necessaria, huius generis quæq; nō debere inferri, nisi Senatus permiserit, secus pro non illatis censeatur. Sed forte apud Christianissimum hoc? etiam & apud Catholicissimum huiusmodi quæq; non admittuntur, sed abijciuntur à Magno consilio: approbante factum Couarru-
uia, viro grauissimo ac sapientissimo. Non desunt huic inclito Regno magna & sana consilia vbi vniuersæ reipub. facies residet, vbi de necessitatibus concluditur publicis, ibi licebit quidquid visum fuerit, fieri. Sed quid ultra dissero, cum lætandum potius & in mutuis congratulationibus dies consumendi, dum Te ingredi videmus, quæ & tempora concupierunt, & locus ipse desiderabat. Tibi Illustriss. Domine sunt delata ea quæ cæteri prætermiserūt, vt nimirum charitatis (quæ non æmulatur, non agit perperam, non content dit præesse) claustra, non turbarum facias: nemo proba-

Præf. 7.
li: vnico
c. 37 n. 4.
Et de rest.
2. partis
§ 9. n. 7.

probari debet, qui suorum rectè factorum superiori suo reddere rationem reformidat, fortitudo diuina virtus est, quæ cum rectè factis infunditur mentibus humanis hæc si à Deo inspirata non est, certe & reliquum non erit absque fuco. Te Deus rebus decidendis præposuit, Te his temporibus assignauit, Te Reipub: elegit, Te Senatui cooptauit, Te his vniuersis difficultatibus præparauit. O felices nos, ô Rempub: felicem, vbi aut Philosophi regnant, aut qui regunt philosophantur. Deum omnis boni optimi datorẽ, laudantes, glorificantes, precabimur atq; precamur, Te vt incolumem seruet, Tibi vires in laboribus suppetat, animũ in difficultatibus augeat, gratiamq; quam præstas & præstabis reipub: referat, quam tu nobis, eandem Tibi DEVS & inclitæ Tuæ domui rependet.





Hist. Polon.
a. Mifcell.

